

Mieng Jeug

Doa woa mieng ouwesjhoes nog sjteet
Deelde ich mit broar, leef en leed
Hont der pap en de mam, daag en nach
Os mit de nuëdige zurg groeët gebrach
Eëpel en alle greunte houwe vier in d'r gaat
En sjpilde in d'r hof, of 't druug woar of naat
Huvelle, mit de tol sjpiele en belke trekke
Wat woare die luuj um te verekke
Bei der Neut op de trepkes zitte
Achter der Zeele van Schaik, sente sjtikke
Bei d'r Kessels Roos ruuke aan 't broeëd
En op d'r Sittarderweg bleef 't jungske Verwer doeëd
En gong mit ing reep en heutje uëver gen sjtroate
Of d'r winkvoeëgel oploate
En oet d'r zomp waterhónder en negerpie..... verkope
Sjlegter Gorisse houw ee verke gesjlag
De wiesvrouw "Unger"houw ee kink gebrag
En vier holde bei Collaris de waar
En kleen Niekske rökde in 't portaal ing dieke sigaar
Vuur ée kwartje ing tuut friete bei d'r Hermans Huub kope
En dan mit de jonge noa d'r zankberg lope

Jan Halmans

Pieëpel

Ummer döl en roeteleboet!
Vloog d'r pieëpel
Noe heëj en dan doa,
Heë fladdert alle blumkes noa
Va blom bis blom
En alles um de buët
Wie zich dat gehuët
Ee muulke hei, en get nektar doa
Ueveral drop en draaf
Zoeë fladdert d'r pieëpel ozze gaad oet!

Jan Halmans

Weigank

't Woar vuur bewoeëners va Boenssem i vreuger ieëwe neet gemakkelig um 't dageliks broeëd te verdenen. Broenssem dat a der rank va de sjoëene mar onvruchbare groeëte heij loog. Broenssem houw alling get vruchbare gronk a de ziej va Austeroa en Merkelbék, mar die woare i egiendom, in deë tied va der adel, zoë wie de fam. De Negri, Vos en Clutt. Wat uëverbleef woar gronk op Rumpen en Sjriervershei en die besjtong oet veul kling persele zankgronk die get haver, rogge en boekweit oplieëverde. Op dizze gronk weulde de kling boere vuur ee gans erm besjtoa.

En greun weië woare op die sjtukker gronk och neet te vinge. Doa-um moos 't vieë 't doeën mit get a gen Heij en d'r busj-rank. Der milk-kuij-sjieëper, dreef jieëkere murge de kuij va 't ganse durp bij-ee noa de plaatsje, woa nog get greun-voor vuur nieks te kriege woar. 't Woar, doe va de ganse gemeensjap. De kuij woare op dizze weigank gans aafgerich.

Went me vreug i der murge op gen, sjtroat de treut hoeët va der kuij-sjieëper da houwe de boere nieks angesj te doë, es de kuij i der sjtaal los te make va der krub. De kuij lepe da hél, noa gen sjtroat, um

zich a te sjléte bij de anger kuij. De kudde gruide a i gen durpsjtroat en gondeweg gonge ze vlot noa de plaatsj woa nog get graas te vinge woar.

Eëve zörgelik en ordentlig, brach der sjieëper i der noa-middig de kuij werm trük i gen durp en jieëker kouw wis genoa, wienieë ze de rei mos verloate, en durch de poat va heur eëge erf oplope, noa ze ieësj get gedronke houwe a 't beëksjke dat langs de Durpsjtroat leep.

Dat sjtukske durpsleëve kos me jieëker daag zieë va april bis oktober.

Jan Halmans

Bronnen: Wandelingen in en om Brunssum van W.J. Vromen
Brunssum de eeuwen door van pastoor W. Moonen

Druk. Druk

Ich hub 't druk, ich hub 't druk,
Bring mich noe neet van mien sjtuk.
Dat huër-ste ummer mieër in dizze tied,
Déks geet dat natuurlik ooch veuël te wied!
D'r aan sjuldig makt zich jieëderree,
Veuël van os zigke noe eemoal neet geer nee!
Jieëderree helpe is wat vier wille,
Mér doa aan kinne vier os ooch vertille!
Doarom hubbe vier 't ooch ummer druk,
'n bedreiging vuur os ege geluk!

Mér d'r is natuurlik ooch de huidige maatsjappie,
Die de drukte makt, mit minder tied vuur vrie!
Die alleen mér vriegt noa prestere en ummer mieër,
In die vroag is déks geen plaatsj vuur veuël vertier!
Die maatsjappie die ummer mieër ooch noa 't individu kiekt,
Tenminste dat is woeë 't de litste joare op liekt!
't buurtgeveul, 't same dinger doeën, same sjterk,
Dat wurd minder, wat-ste ooch dudelik merks!
En dat terwiel vier alleen de sjtried neet aan kinne,
Alleen same vilt d'r zoeë veuël te winne!

Druk zun en 't druk hubbe is good, mér raak neet gans van sjlaag,
Maak ooch tied vriej om te kinne genete van al die daag,
Die dich in 't leëve zunt gegeëve,
Ze zunt flot vuurbie, dan is d'r nieks mieër te beleëve!
Maak wirk d'r van om 't "same-geveul" weer te creëre,
Om zoeë weer een extra sjtuk socialer te weere!
En pries 't individu neet d'r hieëmel in,
Want same zunt vier sjterker en hubbe vier veuël mieër gewin!

Ron Logister.

Lieëver neet beleëve!

D'r zunt van die momente in 't leëve,
Die wils-te lieëver neet beleëve.
Mér ze huëre d'r bie, d'r onger oet komme vier neet,
D'r vuur weg lope kinne vier neet, tot os groeët verdreet!
Es vier same sjterk zunt, kinne vier ooch dan wieër goan,
Want zoeë wie vier wete geet 't wieër in os besjtoan!
Zoeë zal degene deë 't betruf 't ooch wille,
Alleen kint deë dat déks neet mieër noa vertille!

Ron Logister.

Oet 't Leëve Gegrieëpe

Oet 't leëve gegrieëpe zoeë zoch ich lits in de krant,
Weer oerlog en geweld en ich zoog mit leëve geen verbandj!
Es oerlog en geweld weëre gezieën es de orde van de daag,
Dan kinne vieër os afvroage wat os de toekoms bringe maag!
't Leëve is flot vuurbie, dat wete vieër en 't is ooch gewis,
Mér dan kinne vieër ooch drék zigke dat 't leëve op dees welt afgelope is.
Oerlog en geweld is zinloos, verkieërd en bring alleen mér verdreet,
En is ooch zieëker neet de reë dat dees welt vuur os besjteet!
Loate vieër mit jieëderree sameleëve in harmonie,
Dan kinne vieër zigke "oet 't leëve gegrieëpe" en is jieëderree bliej!

Ron Logister.

De daag

Módderdaag, vadderdaag,
Valentijn en deredaag,
Sinterkloas en Krismes,
geld verdene...bizzenis...

Gówwwe daag vuur de blómmiste
bekkere,sjlieters en drogiste,
welk fes d'r óch is,
geld verdene...bizzenis...

De ganse kroam van winkelere
wille dat vier fester viere,
ze wille bótter bei de vusj,
geld verdene...bizzenis...

Wat die dan in 'n paar weëke,
in hun depe tesje sjteëke,
dat is ech gee kattedis,
geld verdene...bizzenis.

Keuk, vla's ,vuurwerk en blómme,
't kan hun allemoal nieks verdómme.
Óch al ruukt 't neet ummer frisj...
Geld verdene...bizzenis...

Dat is neet mien disipliene
Of mót ich óch "zjwat" beiverdene ?
óch wen 't verboane is ?
Geld verdene...bizzenis...!

Thei Janssen †

De gezet

Ich weet van de hood en van d'r rank,
ze hove mich nieks te vertelle,
wen ich s'mörges mien eike goan sjelle,
höb ich de gezet al bei de hank.

't Dagblad, Telegraaf en de Koerier,
die leës ich dan van achter noa vure
en wat d'r neet insjteet,
(dat kan óch waal ins gebure),
dat hoal ich waal oet Elzevier,
óch wat in de brevebus velt op de mat,
weëd hieëlemaal durch mich geleëze,
de reklame die weëd aageprieëze,
't róddel, 't auto en 't ouwwieverblad.
Mar wen 't oavend is,
dat moagt geer ruiig wete,
is alles wat ich dan geleëze höb,
vergange wer, wie ouwe sjtub,
en och wer radikaal vergeëte.
Doarum leef lüj oet sjtad en lank,
leës alling de krantekoppe,
loat uch durch mich neet kulle,
want dan verleest geer uch versjtank.

Thei Janssen †

D'r Haan

Kiek 'm doa ins sjtoa,
zoeë frisj en vroeë.
De brós vuuroet,
en jieëkere daag,
zieng betste kleier aa.

Heë sjut ziene kop.
Zieng vere glimme,
en aaf en tów ,
zuus 'te 'm ing pöl beklimme.

't Pölke verlüst gans sjuldbewus
en kakelend ing veer.
Verleëge noa de anger hónder,
mar sjtiekem hou ze 't geer

Nog vuur de daag is aafgelope,
hat heë ze allemaal besjtieëge,
en hat jieëker pölleke,
van hem ing buurt gekrieëge,

Wat ich in mieng twieëde leëve weëd?
Es ich keze maag...dan haan.
't Is mit al die vrouwlüj waal get druk,
mar... 't liekt mich toch ing gouwe baan.

Thei Janssen †

Kirmes oppe ouwe mert

Es kleen menke weet ich nog, woar der kirmes oppe ouwe mert.
't Zoeëmesj woar 't op 't Linjeplein en in oktoeëber oppe ouwe mert.
Vier vonge der wintjer of klene kirmes, der kirmes van de ouwe mert, ummer der gezelligste.
De besjoateheed makde 't wermer.

Vier koame dan altied nui bie ee bie oma, en dan mit alleman noa de kirmes.
Vuur dat vier bie oma woare koamst-e op de hook Kirksjtroat/Durpsjtroat al der ieësjte kroam teëge.
Doa sjting altied inne vusjboer.
Dan landje vier bie oma aa, koffie mit vlaa!
Van die richzige huffe-vlaa, zoeë wie vlaa huërt te zin.

Went 't tied woar dan trokke vier mit alleman de Durpsjtroat aaf richting kirmes.
Bie Piet Schobben klonk dan al de meziek, 't woar kirmes in oud Broenssem, 't woar fieës!
Langs de kantj van de sjtroat zoot ene mit ene triksak en de patsj vuur zich en probeerde zoeë get bie-
ee te sjarre.
Der kirmes zelf woar verdeeld, links en rechts van de Durpsjtroat.
'n Karresel, sjeettent, sjloek en prul.
Al wat 't zoeë al op ene kirmes gieëft, in die tied ooch nog sjuutjes.

Went vier kinjer os genog geammeseerd houwe dan ginge vier weer op oma aa.
Bis aa Piet Schobben gong dat good.
Doanoa mooste de vrouwluj en kinjer alleen wiejer.
De mansluj koame waal noa.

Es vier dan oma alles van de kirmes vertild houwe, dan gonge vier weer boet sjpieële.
Went de mansluj noa 'n paar drupkes op oma aa trokke, woar der nog 'ns get te eëte
Dan meug en voldoan op heem aa.
Dat woar nog 'ns kirmes, oud Broenssem op zien bis!
Mit de kirmes van de ouwe mert is ooch 'n sjtukske oud Broenssem gesjtorve.
De ouwe mert ligkt al veuël te lang zoeëmer te ligke.
'n Hart dat neet mieë klopt.
Noa joare breuzele zunt Durpsjtroat en ouwe mert eindelijk opgeknap, 't woar mieë wie hoeëgnuëdig!
Noe weer get loate gebuëre op deë vernuujde mert, angesj hubbe vier 'n nuuj lief, mer oane leëve.
Dan is 't insigste wat os blief,de herinnering aan kirmes oppe ouwe mert.

Wiel Roeselers

Loetsje

Went me es baby in der ege lujjer
Uëver de drek deed roetsje
Dan is 't toch zoeë lekker
Om aan diene doem te loetsje

Wie kos me es kindj verlekkerd
Bie der bekker doer de etalaasj klotse
Went doa loge zon lekkere lolly's
'n Fieës om aan te loetsje

'n beugelflesj mit water
En doa get lakrits in loate roetsje

Dan noa 'n paar daag sjuumke trikke
Dat is pas lekker loetsje!

En wurd me weer get ouwer
Vuurbie is klumme, sjpringe, roetsje
Dan trufs doe 'n meëdje
Dat is toch zoeë lekker

Wiel Roeselers

Wat der zoeëmer bringt

't Vasteloavespekske hingt
Frisj gewesje in de kas
Poasjtek aan inne balk
Oppe zulder vas
De fieëste van 't vreugjoar
Hubbe vier gehad
En noe wachte vier verlangend
Wat der zoeëmer in petto had
Witte wolke, der hieëmel blauw
Zonnesjtroale op dien gezich
Der ene 'n nuje leefde
Der angere blij mit 'n vertroewd gezich

Wiel Roeselers